



Zeddel
23. – 25 Hornig 2015

D Zoggelischletzer wie allewiil
Schiesse nid verbii am Ziil
Hesch Zyt - Lueg ihri Fotene ganz in Rueh
do hesch denn ebbys z-due
uf www.zoggelischletzer.ch

Zoggelischletzer 2015 Süüschee:

Zäme-Trennt.....???.....

Zäme-Elei ?? Oder Zäme-Trennt
Weisch vo was-i red, sunscht heschs verpennt
Nei, d Rächtschriibig ischs fyr aimol nid
Obwohl, au die isch ame so richtig Schi....aber nid wohr

Wie immer und uf dr ganze Wält
Gohts aifach immer nur ums Gäld
Uf dr Inslé findes die aine billig
Die Andere sin aber gar nid willig

Oder blibe si zäme, me kas kuum glaube
Um nid e zwatti Hymne müesse z-raube????
Zäme-Elei ? Oder Zäme-Trennt
Jetzt weisch um was es goht, oder hesch doch pennt?

S goht nid nur ums britannische Riich
Hörschs yberall, au am Dalbedych:
Sölle mir jetzt «säge» sage
Oder gohts uns denn erscht rächt an Krage?

**Als Kantonshauptstadt Basel am scheene Rhy
Oder sölls öbe doch drzue no Lieschtel sii
Zwei Regierige kaini ohni Tadel
Oder lömer ys regiere vom Basler-Adel?**

**Sag-i jetzt «Chees», oder Kääs denn doch
Sins Zoggeli oder Holzschueh
Muess-i ikaufe, oder mach-i Kommissione
Wurd sich ämand e Duden lohne?**

**Bini schwarz-rot, oder doch ROT-BLAU
S goht nid um d Sproch, das wüsse mir au
Zäme-Elei ?? Oder Zäme-Trennt
E Satz, wo jetzt fascht jede kennt**

**Alles isch guet, und alles isch schlächt
Kaine isch zfriede oder allne ischs rächt
Hinde isch vorne und vorne isch hinde
S blibt alles wies isch, oder ka-m-es vrbinde??**

**Jetzt ha-n-i sälber e Gnuusch im Kopf
Und bi e ganz e arme Dropf
Zäme-Elei ?? Oder Zäme-Trennt
Hey Bebbi! Wach uf, es wird nid pennt**

**Was zäme isch vrstoht sich nid
Was zäme will, goht nid so gschwind
Au bim Lehrplan 21(!) gits rauchendi Kepf
Und die Glainschte sin die arme Knepf**

**Fusionsinitiative Basel-Stadt und Land
Grosskanton usser Rand und Band
Schottland ohni änglischi Krone
Alles warnt vor ökonomische Zone**

**Was zäme isch, wills nimmi sii
Was zäme will, lossts denn doch sii
Zäme-Elei ?? Oder Zäme-Trennt
Mi Wegger lütet, ouh..hani verpennt**

**I stand denn uf und nach em Morgedringge
Kani grad no em erschte 8er wingge
Stand an dr Haltstell und frier aine aane
Do kunnt-mr e Idee, he nunde Faane
Könnt me nid, so zum probiere
D DB und SBB fusioniere
D BLT mit dr BVB
Doch ei Kanton? Oh jeh mine
Solothurn wird Bärn und dr Jura Waadt
So Spielereie fänd ich glatt
Dr Aargau muess bliibe, i bitt
Denn grad näbe Ziri? Das mach ich nid mit**

**Mi 8-er Trämlí quitscht ums Egg
Und all die Hirngspinnscbt sin eifach weg
Zäme-Elei ?? Oder Zäme-Trennt?**

**S Bescht wär
S blibt genau e-so, wies jede kennt!!!!!!!!!!!!!!**